

JEDAN GRAD, JEDNA BORBA

Piše ko zna, smije i umije; izlazi kad treba i mora; štampa se u kućnoj radinosti.

BUDŽET KANTONA SARAJEVO ZA 2018. godinu = 767 miliona NAŠIH PARA

**= zbir budžeta tri kantona koja po bogatstvu slijede Sarajevski
(Tuzlanski, Zeničko-dobojski, Hercegovačko-neretvanski)**

= ŠTA OD TOGA DOBIJAMO MI KOJI SMO SVOJIM RADOM NAPUNILI BUDŽET?

**Budžet neće značajnije doprinijeti rješavanju naših problema:
gradskog prevoza, saobraćajnih gužvi, vodosnabdijevanja,
zagađenja zraka i stihijske stambene izgradnje.**

KAKO VLASTI VIDE BUDŽET?

Vlada je budžet okarakterisala kao razvojni.

**Budžet međutim izostavlja bilo kakvo ulaganje direktno u privredu.
Prethodnih godina izdvajalo se malo, ove godine - NIŠTA.**

Budžetsko ulaganje u industriju je inače legitimna ekonomska politika
kada se industrijska proizvodnja nalazi u konstantnom padu, što je kod nas, slučaj već godinama.

**Istovremeno je socijalni segment vrlo ograničen
i ne odražava narastajuće potrebe sve širih slojeva društva koji
opstaju na samom rubu egzistencije.**

Projekti planirani budžetom su infrastrukturni, ali neće automatski doprinijeti ravnomjernom razvoju različitih grana privrede, uključujući i industriju kao stub privrednog rasta. Istovremeno tek djelomično odgovaraju potrebama stanovništva - jer su krojeni prema potrebama jedine strategije razvoja s kojom su do sada vlasti izašle, a to je razvoj turizma i uslužnog sektora generalno.

Po stanovništvo je povoljno kada se turizam razvija uravnoteženo i uporedo s drugim privrednim granama. Oslanjanje privrede samo na turizam međutim najčešće dugoročno koči sveukupni društveni razvoj:

! Najavljivani razvoj turizma tražice dosta javnih ulaganja u infrastrukturu, ali prema diktatu potreba povremenih gostiju i, dosta nemirnog i nestabilnog, turističkog tržišta, a ne prema potrebama stanovništva.

! Na tržištu će prevladati sezonski, tj. nesigurni i niskoplaćeni poslovi za nekvalifikovanu ili niže kvalifikovanu radnu snagu, što će – budući da je obrazovanje već sad pod pritiskom da slijedi tržišna kretanja, rezultirati generalnim spuštanjem prosječnog nivoa obrazovanja.

! Pad nivoa obrazovanja koči ukupan napredak društva, ali i rezultira opštom nesigurnošću ekonomske egzistencije.

! Eksplozivan i nekontrolisan porast turističkih kapaciteta i priliv turista otežava uslove života za stanovništvo i dovodi do rasta životnih troškova.

NEKI 'PRIORITETI' POTROŠNJE

Ski-centar Bjelašnica: gotovo 3 miliona

Opet se ulaže u skijalište na Bjelašnici koje godinama, između ostalog i usljed klimatskih promjena, posluje s gubitkom. Predviđanja su da će se taj trend nastaviti.

Ovim najnovijim davanjem doseže se cifra od ukupno preko 30 miliona KM za sadržaje i infrastrukturu centra koji kao ni mnogi drugi objekti napravljeni narodnim parama, ne opravdava društvenu funkciju.

To će reći, centar praktično ni nema nekomercijalne upotrebe i kao takav nema nikakve vrijednosti za sve veći broj ljudi koji ne mogu platiti ni karte ni ski-opremu - a svojim su radom obezbijedili novac za izgradnju ovog kompleksa.

16 miliona za ceste

U saobraćajnice se konstantno ulaže, a saobraćajne gužve bivaju sve gore, kao i zagađenje, dok se nastavlja propadanje cesta u padinskim dijelovima grada. Istovremeno se zanemaruje gradski prevoz i, naročito bitne, prigradske željeznice koje bi trajno riješile problem gužvi i zastoja na prilazima gradu i u gradskoj jezgri.

1,1 milion za elektronski dnevnik

U školama nema sapuna i toalet-papira, nekim školama se konstantno prijeti zatvaranjem - pod krinkom 'racionalizacije', a kantonalna vlada planira potrošiti preko milion KM, na veoma jednostavnu bazu podataka, da bi roditelji imali uvid u ocjene djece bez dolaženja u školu.

PRIHODI?

Bez poreza na luksuz, Kanton Sarajevo i dalje je raj za bogate.

Ni ovaj budžet ne odražava nikakve promjene poreske politike. Raznorazni špekulanti nastavljaju gomilati nekretnine koje se čuvaju za preprodaju i daju u komercijalni najam, dok društvo plaća ceh betonizacije prostora, uništavanja životnog okoliša, ograničenja infrastrukture i sve viših cijena stanovanja.

Vodovod na Bjelašnici: još 2 miliona na poklon vlasnicima apartmana

Budući da stalna naselja u tom kraju već imaju vodovod, radi se isključivo o vodosnabdijevanju izvorskom vodom luksuznih apartmana na Bjelašnici, za koje sami vlasnici neće morati izdvojiti ni marke - sve će biti plaćeno našim novcem.

Budžet 2018. - opet bez javne rasprave uživo

Jedinu javnu raspravu za stanovništvo o Nacrtu budžeta održala je nestranačka društveno-politička organizacija Jedan grad, jedna borba, iako tu obavezu imaju vlasti na svim nivoima lokalne samouprave.

Vlasti sistematski izbjegavaju javne rasprave, zatvarajući taj jedini preostali kanal, osim izbora, za naše učešće u političkom odlučivanju.

Zastupljenost naših potreba i interesa u donošenju političkih odluka nikako ne može biti garantovana pukim prisustvom predstavnika političkih stranaka u institucijama - budući da monopol na oblikovanje njihovih odluka i stavova imaju rukovodstva stranaka i klanovi moćnika.